

UCAPAN PERDANA MENTERI DI UPACARA PEMBUKAAN RASMI JALANRAYA BINTULU – TANJUNG KIDURONG, BINTULU, SARAWAK, PADA 10 SEPTEMBER 1979

Yang Amat Berhormat Tan Sri Datuk Patinggi Haji Abdul Rahman Yaakub, Ketua Menteri Sarawak, Yang Berhormat Datuk Amar Dunston Endawie, Timbalan Ketua Menteri merangkap Menteri Kerjaraya Sarawak, Yang Berhormat Encik Celestin Ujang, Menteri Kebudayaan Belia dan Sukan, Sarawak, Yang Berusaha Pegawai Daerah Bintulu, Encik Musa Giri, Pengurus Besar Lembaga Kemajuan Bintulu, Datuk Jamaluddin Abu Bakar, Tuan-tuan dan puan-puan sekalian.

Saya bersyukur kehadiran Allah Subhanahu Wataala kerana dalam kunjungan saya ke Negeri Sarawak kali ini, saya dapat peluang melawat Bintulu untuk menemui rakyat di sini dan seterusnya melakukan pembukaan rasmi Jalanraya Bintulu – Tanjung Kidurong. Saya ucapkan berbanyak terimakasih serta setinggi-tinggi penghargaan kepada Kerajaan Negeri, khususnya Tan Sri Datuk Patinggi Haji Abdul Rahman Yaakub, kerana memberi penghormatan ini kepada saya.

Saya juga mengucapkan berbanyak terimakasih serta setinggi-tinggi penghargaan kepada rakyat dan penduduk Bintulu, Kampung Sepupok dan Sebauh, di atas sambutan meriah yang telah diberikan kepada saya sempena lawatan ini. Lawatan saya ke Negeri Sarawak pada kali ini amatlah berfaedah kerana di samping dapat beramah mesra dengan rakyat jelata, saya dapat juga menyaksikan sendiri kemajuan yang telah dicapai serta mengetahui masalah-masalah yang dihadapi oleh kerajaan dan rakyat negeri Sarawak dalam pelaksanaan rancangan-rancangan pembangunan.

Memang tidak boleh dinafikan bahawa masa depan negeri Sarawak adalah cerah, memandangkan potensi yang luas serta hasil yang banyak dari sumber kayu kayan dan pengeluaran minyak dan gasnya. Saya penuh yakin dengan pimpinan yang jujur dan dinamis, serta usaha-usaha jangka panjang yang teratur dan menyeluruh, rakyat negeri Sarawak akan dapat melihat, dalam sedikit masa lagi, pembangunan yang lebih pesat serta menikmati hidup yang lebih makmur dan bahagia.

Di bawah Kajian Separuh Penggal Rancangan Malaysia Ketiga, peruntukan pembangunan bagi Negeri Sarawak telah ditambah dari \$1.7 ribu juta kepada \$2.5 ribu juta. Peruntukan asal sebanyak \$1.7 ribu juta

itu, merupakan 8.93 peratus daripada keseluruhan peruntukan negara bagi Rancangan Malaysia Ketiga. Dengan tambahan ini, peruntukan bagi Negeri Sarawak di bawah Rancangan Malaysia Ketiga, adalah 100 peratus lebih tinggi daripada peruntukan yang diberikan kepadanya di bawah Rancangan Malaysia Kedua. Kesemuanya ini, jelas membuktikan hasrat dan azam Kerajaan Barisan Nasional Persekutuan hendak membawa kemajuan kepada rakyat, terutama ke negeri-negeri yang telah tinggal, seperti Sarawak.

Kerajaan Persekutuan Barisan Nasional akan terus memberi sokongan dan bantuan kepada Kerajaan-kerajaan Negeri, terutama dalam melaksanakan program-program pembangunan. Hanya dengan kemajuan dan kemakmuran yang lebih adil, kestabilan dan keamanan dapat diwujudkan. Oleh itu, terpulanglah kepada rakyat bagi memastikan supaya Kerajaan Negeri yang di bawah pimpinan Tan Sri Datuk Patinggi Haji Abdul Rahman Yaakub, dapat terus kekal mentadbirkan Negeri Sarawak. Dengan jalan ini, maka segala program pembangunan yang telah dirancang untuk faedah rakyat, dapatlah terus dilaksanakan.

Memang banyak kemajuan yang telah diperolehi sejak Sarawak memasuki Malaysia 16 tahun yang lalu. Rakyat Negeri Sarawak telahpun sedikit sebanyak, dapat menikmati faedah dan kesannya.

Tuan-tuan dan puan-puan sekalian,

Kerajaan Barisan Nasional memang sentiasa berazam untuk membawa kemajuan yang lebih pesat lagi kepada rakyat, dan akan berusaha dengan lebih bersungguh-sungguh dan lebih giat lagi ke arah keadilan sosial, serta ke arah kehidupan yang lebih baik bagi semua rakyat dan penduduk. Inilah hasrat kami, dan kami harap rakyat jelata dapat memberikan sepenuh kepercayaan dan kerjasama mereka bagi membolehkan Barisan Nasional menjayakan cita-cita ini.

Saya menyeru rakyat Negeri Sarawak supaya terus memberikan sokongan dan kepercayaan mereka kepada Kerajaan Barisan Nasional Negeri Sarawak supaya setiap perancangan dan pelaksanaan pembangunan sosio-ekonomi di negeri ini dapat disiapkan bagi mencapai matlamat kita untuk membawa kemajuan, kemakmuran dan keamanan.

Sebagai pucuk pimpinan Kerajaan Persekutuan dan Barisan Nasional Kebangsaan, saya memberi jaminan kepada rakyat Negeri Sarawak bahawa Kerajaan Persekutuan akan terus dan tetap memberikan bantuan dan kerjasamanya kepada Kerajaan Negeri yang ada sekarang. Oleh

itu rakyat hendaklah mengundi calon-calon Barisan Nasional bagi memastikan pentadbiran Kerajaan Negeri Sarawak yang ada sekarang ini, dapat meneruskan usaha-usahanya.

Tuan-tuan dan puan-puan sekalian,

Perkongsiannya berbagai parti politik dalam Barisan Nasional telah mewujudkan kestabilan politik di seluruh tanahair, termasuklah Sarawak. Ia telah dapat mengukuhkan lagi perpaduan negara, dan mewujudkan kerjasama dan persefahaman yang lebih erat di kalangan rakyat berbilang kaum. Tiada sesiapa pun yang boleh menafikan kemajuan dan kejayaan yang telah kita perolehi, kemakmuran dan kebahagiaan yang telah dinikmati oleh rakyat jelata, dan keamanan dan ketenteraman yang telah diperolehi oleh negara kita.

Kerajaan Barisan Nasional telah berjaya meringankan beban rakyat terutama yang miskin dan membantu rakyat dalam sebarang kesulitan mereka. Kerajaan Barisan Nasional telah berjaya mentadbirkan negara dan berjaya mewujudkan kestabilan politik, ekonomi dan keselamatan dalam sebarang keadaan dan suasana – menghadapi ancaman penganas komunis, ancaman perselisihan dan persefahaman kaum, anasir-anasir subversif dalam negeri, banjir, inflasi dan lain-lain lagi.

Sebagaimana kita sedia maklum, Barisan Nasional meletakkan calon-calonnya di semua kawasan dalam Pilihanraya Negeri Sarawak. Kesemuanya bertanding di atas nama Barisan Nasional, serta menggunakan simbol dan manifesto yang sama, iaitu simbol dan manifesto Barisan Nasional. Kita telahpun berjaya memenangi empat kawasan tanpa bertanding.

Manifesto Barisan Nasional bagi Negeri Sarawak telahpun diisytiharkan. Sungguhpun Barisan Nasional adalah satu-satu parti yang mempunyai kemampuan, kebolehan dan keupayaan, untuk melaksanakan dan menunaikan segala hasrat dan cita-citanya, kami tidak akan mengemukakan janji-janji yang mustahil, yang tidak boleh dilaksanakan dalam masyarakat Malaysia yang berbilang kaum. Percayalah bahawa hanyalah Barisan Nasional sahaja yang boleh memastikan masa depan negara yang lebih terjamin dan hanyalah Barisan Nasional sahaja yang boleh memastikan bahawa rakyat jelata dapat terus hidup dalam aman, makmur dan bahagia.

Saya menyeru setiap rakyat di Sarawak supaya memiliki naskhah Manifesto Barisan Nasional bagi Negeri Sarawak. Kami telah terbitkan

manifesto ini dalam semua bahasa, iaitu Bahasa Malaysia, Bahasa Iban, Bahasa China dan Bahasa Inggeris. Saya berharap setiap rakyat khusus pengundi-pengundi, benar-benar memahami hasrat dan azam Barisan Nasional untuk membawa kemakmuran yang lebih meningkat bagi rakyat serta keamanan dan kestabilan politik di tanahair termasuklah Negeri Sarawak.

Tuan-tuan dan puan-puan sekalian,

Pembukaan Jalanraya Bintulu – Tanjung Kidurong ini, merupakan salah satu kejayaan yang telah dicapai oleh Kerajaan Barisan Nasional Negeri Sarawak. Kemajuan dalam pembinaan rangkaian jalan-jalanraya di Negeri Sarawak telah dapat ditingkatkan dari tahun ke setahun. Di bawah Rancangan Malaysia Ketiga, Kerajaan Persekutuan Barisan Nasional telah menyediakan peruntukan sebanyak \$234 juta untuk pembinaan jalanraya di Negeri Sarawak. Dari jumlah ini, sebanyak \$30 juta ialah untuk pembinaan jalanraya bagi kawasan-kawasan luar bandar. Dengan jumlah peruntukan yang besar dari Kerajaan Persekutuan ini, maka matlamat untuk menyiapkan pembinaan jalanraya sepanjang 530 batu akan dapat dijayakan.

Dengan terbuktinya Jalanraya Bintulu – Tanjung Kidurong ini dan dengan siapnya kelak pelabuhan-air-dalam di Bintulu serta lain-lain kemudahan-kemudahan infrastruktur perindustrian, pertumbuhan ekonomi Negeri Sarawak akan meningkat lagi. Ini sudah tentu dapat membawa faedah kepada rakyat negeri ini seluruhnya. Oleh itu, pastikanlah kejayaan calon-calon Barisan Nasional dalam pilihanraya Negeri Sarawak.

Akhirnya, saya sekali lagi mengucapkan terimakasih dan penghargaan kepada semua pihak yang telah bersama-sama menjayakan upacara ini, dan seterusnya menjayakan lawatan saya ke Negeri Sarawak kali ini. Saya mendoakan Sarawak maju jaya di bawah pentadbiran Barisan Nasional.

Tuan-tuan dan puan-puan sekalian,

Dengan ini, saya dengan nama Allah yang Maha Pemurah lagi amat Mengasihani, mengisytiharkan Jalanraya Bintulu – Tanjung Kidurong ini, dibuka dengan rasminya.

Terima kasih.